



Sud Bosne i Hercegovine
Суд Босне и Херцеговине

Broj: S1 3 IŽ 038610 20 IŽ
Sarajevo, 04.11.2020.godine

Sud Bosne i Hercegovine u Sarajevu, u Apelacionom upravnom vijeću, sastavljenom od sudija dr Branka Moraita, kao predsjednika vijeća, Zvezdane Antonović i Vesne Trifunović, kao članova vijeća, odlučujući o žalbi Gušić Snježane, Leirvikveien 67b, 5179 Godvik, Norway, izjavljenoj protiv odluke Centralne izborne komisije Bosne i Hercegovine, broj: 06-1-07-1-1059/20 od 28.10.2020.godine, u nejavnoj sjednici, održanoj dana 04.11.2020.godine, donio je

R J E Š E N J E

Žalba se odbija

O b r a z l o Ź e n j e

Odlukom Centralne izborne komisije Bosne i Hercegovine, broj i datum navedeni u uvodu, podnosiocu žalbe odbijen je upis u izvod iz Centralnog biračkog spiska za glasanje izvan BiH za Lokalne izbore 2020.godine za Grad Mostar, za ukupno 441 birača po prijavama podnesenim do 06.10.2020.godine iz razloga što uz prijavu nije priložila validan identifikacioni dokument izdat u Bosni i Hercegovini.

Protiv ove odluke žaliteljica je blagovremeno uložila žalbu navodeći da je putem e-maila poslala ispunjen obrazac PRP-2 sa kopijom lične karte koja je nažalost istekla 06.08.2020.godine, a koju nije bila u prilici produžiti zbog situacije sa koronom. Kao dodatni dokaz o identitetu dostavlja kopiju norveškog pasoša, te ponovo i prijavu PRP-2 koji je poslan 22.09.2020.godine. Predlaže da se žalba uvaži.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana.

Ispitujući ožalbenu odluku u okviru žalbenih navoda vijeće je zaključilo da žalba nije osnovana.

Prema stanju u spisu ovo vijeće konstatuje da je CIK BiH, prije donošenja ožalbene odluke, a prilikom razmatranja prijave žalitelicea za glasanje izvan BiH-Lokalni izbori 2020.godine za Grad Mostar koja je dostavljena dana 23.09.2020.godine putem e-mail snezana.gusic@gmail.com utvrdila da je žaliteljica uz prijavu priložila kopiju lične karte Bosne i Hercegovine izdate od MUP HNK

Mostar, a kojoj je istekao rok važenja sa danom 06.08.2020.godine, koja nije validan identifikacioni dokument u smislu člana 5.12 stav 4. Izbornog zakona BiH.

Odredba člana 3.15 stav (1) Izbornog zakona BiH („Službeni glasnik BiH“ broj 23/01 do 31/16), propisuje da državljanin BiH koji živi u inostranstvu, a ima biračko pravo u skladu sa Zakonom i upisan je u Centralni birački spisak, da bi se nalazio u izvodu iz Centralnog biračkog spiska dužan je da se za svake izbore prijavi CIK BiH. Prijava mora biti zaprimljena u CIK BiH prije roka koji odredi CIK BiH, u periodu nakon raspisivanja izbora. Uz popunjenu i potpisanu prijavu podnosilac prilaže i dokaz o identitetu i podatke o tačnoj adresi u inostranstvu, te izjašnjenje o opciji glasanja u diplomatsko-konzularnom predstavništvu ili putem pošte.

Žaliteljica se mogla putem internet stranice i putem info linije CIK BiH informisati o statusu njene prijave za glasanje izvan BiH i na taj način otkloniti nedostatak koji se ogleda u činjenici da nije dostavljen validan dokaz o identitetu (istekla važnost lične karte), što ista nije učinila.

Kako žaliteljica nije uz prijavu dostavila validan dokaz o identitetu koji bi potvrdio da su ispunjeni uslovi da se u smislu odredbe člana 5.12 stav (4) Izbornog zakona BiH nađe na izvodu iz Centralnog biračkog spiska za glasanje van BiH, to je pravilna odluka CIK BiH kojom se odbija njegova prijava za glasanje izvan BiH. Ovu činjenicu žaliteljica ne osporava žalbenim navodima.

Takođe, žaliteljici nije oduzeto biračko pravo za Lokalne izbore 2020.godine za Grad Mostar, nego samo mogućnost da glasa putem pošte izvan BiH na ovim izborima. Istaće moći glasati na redovnom biračkom mjestu u općini u kojoj ima prijavljeno prebivalište u BiH.

Iz navedenih razloga Apelaciono upravno vijeće ovog suda nalazi da je pobijana odluka Centralne izborne komisije Bosne i Hercegovine pravilna i zakonita a žalba neosnovana, pa je istu primjenom odredbe člana 81. stav 1. druga rečenica, Zakona o upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

Predsjednik vijeća
S u d i j a
dr Branko Morait